

ԿԱՐԳ

ԳԻՏԱԿԱՆ ՍԱՐՔԵՐԻ ԵՎ ՍԱՐՔԱՎՈՐՈՒՄՆԵՐԻ ՁԵՌՔԲԵՐՄԱՆ ՀԱՄԱՐ ՖԻՆԱՆՍԱԿԱՆ ԱԶԱԿՑՈՒԹՅՈՒՆ ՏՐԱՄԱԴՐԵԼՈՒ ՄՐՑՈՒՅԹԻ

1. Սույն կարգով սահմանվում է Հայաստանի Հանրապետության պետական բյուջեից գիտական և գիտատեխնիկական գործունեության բազային ֆինանսավորման ծրագրում ընդգրկված գիտական պետական կազմակերպություններին կամ բուհերին (այսուհետ՝ Կազմակերպություն) գիտական սարքի/սարքավորման ձեռքբերման համար ֆինանսական աջակցություն տրամադրելու մրցույթի կարգը:

2. Հայաստանի Հանրապետության գիտության կոմիտեն (այսուհետ՝ Կոմիտե), սույն կարգի պահանջներին համապատասխան, կազմակերպում է Կազմակերպությունների կողմից գիտական սարքի/սարքավորման ձեռքբերման համար ֆինանսական աջակցություն տրամադրելու նպատակով ներկայացված հայտերի (այսուհետ՝ Հայտ) ընտրության մրցույթ (այսուհետ՝ Մրցույթ):

3. Մրցույթի մասին հայտարարությունը հրապարակվում է Կոմիտեի պաշտոնական կայքում՝ Հայտեր ներկայացնելու համար սահմանված վերջնաժամկետից առնվազն երեսուն օր առաջ:

4. Կազմակերպությունը Կոմիտե է ներկայացնում Հայտ՝ Կոմիտեի կողմից սահմանված կարգով և ձևին համապատասխան:

5. Հայտերը գնահատելու համար Կոմիտեն ստեղծում է մրցութային (գնահատող) հանձնաժողով (այսուհետ՝ Հանձնաժողով), հաստատում է Հանձնաժողովի անհատական կազմը և աշխատակարգը:

6. Հայտերն անհրաժեշտության դեպքում վերադարձվում են լրամշակման, ապա տրամադրվում Հանձնաժողովին:

7. Հայտում հիմնավորվում է տվյալ գիտական սարքի/սարքավորման ձեռքբերման անհրաժեշտությունը և իրականացվող գիտական և/կամ գիտատեխնիկական ծրագիրը, բերվում են տեղեկություններ գիտական սարքը/սարքավորումն օգտագործող մասնագետների որակավորման, սարքի/սարքավորման ընթացիկ շահագործումն ապահովելու ունակության, ինչպես նաև սարքի/սարքավորման ընդհանուր օգտագործման անհրաժեշտության վերաբերյալ:

8. Հայտերի ընտրության ժամանակ նախապատվություն տրվում է այն Հայտին, որում.

1) գիտական սարքի/սարքավորման միջոցով իրականացվելիք գիտական և/կամ գիտատեխնիկական ծրագիրն արդիական է կամ ուղղված է Հայաստանի Հանրապետության տնտեսության կարիքների բավարարմանը կամ անվտանգության մակարդակի բարձրացմանը նպաստող հետազոտությունների կատարմանը,

2) գիտական սարքի/սարքավորման հետ աշխատելու համար ներկայացված մասնագետների որակավորումը հնարավորություն է տալիս իրականացնելու գիտության և տեխնիկայի արդի մակարդակին համապատասխան հետազոտություններ,

3) բավարար են գիտական սարքի/սարքավորման ընթացիկ շահագործումն ապահովող անձնակազմի մասնագիտական որակավորումը և Կազմակերպության ֆինանսական միջոցները,

4) ապահովված է գիտական սարքի/սարքավորման ինքնավար կամ առկա այլ սարքերի/սարքավորումների հետ համատեղ աշխատելու հնարավորությունը,

5) գիտական սարքը/սարքավորումը նախատեսված է մեկից ավելի Կազմակերպությունների համատեղ օգտագործման համար,

6) առկա է (են) արտաբյուջետային միջոցների հաշվին համաֆինանսավորող կողմ (կողմեր)՝ ըստ համաֆինանսավորման համամասնությունների:

9. Համատեղ օգտագործման գիտական սարքի/սարքավորման ձեռքբերման համար Հայտ ներկայացնում է այն Կազմակերպությունը, որտեղ գիտական սարքը/սարքավորումը տեղակայվելու է: Հայտատու Կազմակերպության (այսուհետ՝ Կազմակերպություն I) կողմից ներկայացված Հայտին կցվում է առնվազն մեկ շահագրգիռ Կազմակերպության (այսուհետ՝ Կազմակերպություն II) հիմնավորումը՝ վերջինիս գիտական և գիտատեխնիկական գործունեության համար այդ սարքի/սարքավորման անհրաժեշտության մասին:

10. Հայտերի վերջնական գնահատականների հավասարության դեպքում նախապատվություն տրվում է այն Հայտին, որում շահագրգիռ Կազմակերպությունների (Կազմակերպություն II, Կազմակերպություն III և այլն) թիվը, ինչպես նաև համաֆինանսավորման չափաբաժինն ավելի մեծ է, իսկ վերջիններիս հավասարության դեպքում Հանձնաժողովը կազմակերպում է այց Կազմակերպություն I՝ տեղում ծանոթանալու դրա նյութատեխնիկական բազայի վիճակին և համապատասխան մասնագետների առկայությանը: Դրանից հետո միայն տրվում է համապատասխան եզրակացություն:

11. Հանձնաժողովը գնահատման արդյունքների հիման վրա կազմում է վարկանիշային ցանկ՝ Հայտերի վերջնական գնահատականների նվազման կարգով:

12. Կոմիտեի նախագահը, հիմք ընդունելով Հանձնաժողովի կողմից կազմած վարկանիշային ցանկը, հաստատում է ֆինանսական աջակցություն ստացող Կազմակերպությունների ցանկը՝ ըստ տվյալ գիտական սարքի/սարքավորման ձեռքբերման համար առավելագույն գնահատական ստացած Հայտի: